



Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allangortinneqarnissaannik inatsisissatut siunnersuummut missingiutip (Pinerluttulerinermi eqqartuussisarnermi digitalimik attaveqaatinik atuineq, suliassat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartussaataanerannut ukioritineqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.
(Aningaasaqarnermut, Aatsitassanut, Inatsisit Atuutsinneqarnerannut Naligiissitaanermullu aalakkersuisoq)
(Siullermeerneqarnera)

Demokraatit Naalakkersuisut siunnersuummut pingaartumut saqqummiussimmata qutsavigaat.

Eqqartuussisarnermut inatsimmi aalajangersakkat tulluussarneqarneranut siunertaavoq Kalaallit Nunaanni Danmarkimilu eqqartuussisarnermut inatsisit tulluunnerulernissaat. Suliassartaqaqaaq, Kalaallit Nunaannilu eqqartuussisarnermik inatsisip pinerluttulerinermullu inatsisimmi aaqjissuuteqqitassat amerlapput Kalaallit Nunaanni inatsisitigut illersugaanerup ullutsinnut naleqqunnerulersinnissaanut, nutarterneqarnissaanut minnerunngitsumillu naapertuilluartunngortinnissaanut.

Soorunami Demokraatit inatsiseqarnermut tunngasut Naalakkersuisut takorluugaai tigullugillu atuarsimavaat, sapaatip-akunneri arlalialunnguit matuma siorna nassiunneqarsimasunut. Iluaraarput, ilaatigut amerlasuunik pitsaasunik pilersaaruteqartoqarnera. Isumaqarpugulli, politikikkut kissaatit anguniakkallu eqqartuussiveqarfitta eqaallisarnissaanut kigaappallaartartut – minnerunngitsumik innuttaasut pinerlineqarsimasullu isaannik isigalugit. Oqimaattorujussuullutillu paamaarunneqarpassippot politikikkut kissaatigisat piviusunngortinnissaat, aalajangikkat naggataatigut – danskit justitsministeeriaqarfiannit oqaaseqaatitalerlugit, naaperiaanermik naggaserneqartartussaammata, kissaatigisatsinnut tulluuttuaannangitsunik.

Assersuutigalugu isertitsisarfitsinni utaqqisoqartarneranut, akuerineqarsinnaanngitsumut suli attassinnaasumik aaqjiisoqanngilaq, taassuma kingunerisarmagu, pinerliisimasup piaartumik pineqaatissinneqarneranut kinguneqartinneqartannginnera. Naapertuilluartumik misiginissamik innarliisarpoq. Taamaattumik una iluatsillugu Naalakkersuisut apererusuppakka, suliniutit tigussaasut oqaloqatiginnerillu suut justitsministeeriaqarfimmut aallartinneqarsimanersut eqqartuussinerit, isertitsisarfimmut inissiinermik aaliangikkat, pisariinnerusumik piviusunngortinnissaannut?

Pivusoq imaappoq, pinerliisimasut suli qaammaterpassuarni isertitsivimmut isernissaminnut utaqqisarmata, ilaatigullu ukiorpassuit angusinnaasarlugit. Naapertuutinngilluinnarpoq, piffinni inukitsunnguani, pinerliisimasut aqqusinermi takussaasarnerat, pinerlisatillu naapissinnaasarlugit. Taakku pillugit Demokraatit uani Upernaaneranani ataatsimiinnermi aaliangiiffigisassatut siunnersuuteqarpugut. Qilanaaraara, pinerlineqarsimasunut naapertuilluartumik pineqartarnerinut oqallisiginninnissarput.



Ilisimavarpulli aamma, pinaveersaartitsineq apeqqutaalluinnartuusooq isertitsivinni inissat kisiisa amerlingikkaluarlugit, aammattaaq pineqaatissiisernerup qaffaanarneratigut, ajornartorsiummillu tamakkiissumik aaqqiinavianngitsoq. Tassa suliaassarpassuaqarpugut isumaginninnermut- peqqissutsimullu politikimut tunngatillugu nunatta innuttaanut pitsaanerusumik inatsisitigut illersorneqarneq kissaatigisarput iluatsissappattaaq.

Iluarisimaarparpulli, uani siunnersuuteqarnermi pitsanngorsaatisanik suliniutinik tigussaasunik saqqummiussisoqarmat, suliaassat nassuernertut suliarineqartut eqqartuussisumik peqateqanngikkaluarluni eqqartuunneqarsinnaalernerannik periarfissiisut. Allatummi iliorneq naleqqutinngitsumik allaffissornerujussuarmillu pilersitsissammat. Taamatullu pitsaavooq, eqaallisaaniarneq siunertaralugu siunertaammat, siunissami digitalimik ingerlatsinerit sulianut pisariillisaatit atorneqartalissammata, aammali qulakkeerniarlugu pappiaqqat sulianut tunngassuteqartut digitalimik nassiuunneqartalernissaat. Tamaat isigalugu pisariaqartumik pisariillisaataallunilu nutaaliornissamut suliniutaavooq. Eqqumaffigissavarpulli, suliat nutarterneranni atuutilernissaanut ikaarsaartoqartussaanera, tamannalu attuumassuteqartunut tutsinneqassanngimmat, tassani pineqarlutik pinerliisimasooq pinerlisarlu. Allatut oqaatigalugu qulakkeerneqassaaq illuatungeriit digitalimik atuinissamut ilisimaarinninnissaat, tassami innuttaasut tamarmik nunatsinni soorlu assersuutigalugu Sullissivik aamma NemID atugarilersimangimmassuk suli.

Demokraatit neriuutigilluinnagaasa ilagaat, suliniutit qulaani pineqartut siunissami pinerlineqarsimasut inatsisitigut illersorneqarnerinut ima iluaqutaalersimatigissasooq, suliaassat sukkannerujussuarmik suliarineqartaleneri. Ukkatarinnineq annertoorujussuaq pisariaqarpoq suliaassani, meeqqat akuuffigisaanni. Soorlu assersuutigalugu ilaqtariinnut tunngasuni aammalu kinguaassititigut pinerliinerni, meeqqat inuusuttullu eqqunngitsuliorfigineqarsimatillugit. Taamaattumik naatsorsuutigaarput, Kalaallit Nunaata Istanbul-imut isumaqatigiisummut ilaalernissaanut aaliangernissaq inatsisitigut tulluussaannermut suli annertunermik kinguneqassasooq, ullumikkumiit annertunerujussuarmik, pinerlineqarsimasut illersornissaannut siunertaqartunik.

Naggataatigullu eqqartuussisut 65-iniit 70-inut ukioqarlutik pinngitsaalisamik suliunnaartarnerannut tunngatillugu, tamanna iluarisimaarparput. Tunngavilersuutit tassani ersaripput. Taamaattorli maluginiarparput, aaliangikkanut sunnuteqarsinnaasooq, utoqqalineri sanngiillisimaneq pissutigalugu. Taamaakkaluartooq erseqqissarusullutigu, oqaaseqaat tamanut tunngammat, inuimmi tamarmiunngitsut, tassani aamma eqqartuusseqaataasartut utoqqalinerit pillugu sanngiillineq ajormata. Nunami Kalaallit Nunaatut ittumi, utoqqaat soraarninngoreersimasut atorluarnissaannik pisariaqartitsisorujussuuvugut, inuiaqatigiit nungusaataannngitsumik ingerlassagutta. Aammali isiginngitsuusaarsinnaanngilarput uagut Kalaallit Nunaanni Danmarkimut sanilliulluta inuunikinnerusaratta. Taamaattumillu isumaqatigalugu, aalajangersakkat tulluussartuarnissaat pisariaqartoq inatsisit Kalaallit Nunaanni ataqatigiinnermikkut isumaqassappata. Taamaattumik pissusissamisoorpoq tamatsinnut apeqqutigissallugu, allannguut ilumut Kalaallit Nunaanni Kalaallit Nunaannullu qanoq isumaqarnerisooq? Taannalumi iluaqutaasumik ataatsimiititaliami oqaloqatigiissutigineqarsinnaammat, ataatsimiititaliamut susassaartumut innersuupparput.

Taamatut oqaaseqarluta oqallilluarnissamik kissaassivugut sulilluarisilu.